



Kamis, 21 Desember 2023
Ogen : 1 Samuel 1: 9-18



Terus Ertoto



Mbarenda ope lenga lit media sosial bagi Facebook, Twitter, Instagram, TikTok, mbue kalak nungtungken isi pusuhta ku bas buku diary. Buku diary e ise pe labo meteh isina kecuali si mada. Isi diary e pe ermacam-macam, mulai arah kejadiin meriah ukur, nembéh ate, ceda ate rsd. Tapi gundari kalak banci nungtungken kerina isi pusuhta arah HP janah kalak sideban pe banci ngogesa. Kinata buena kalak nutungken isi pusuhta arah media social, turah penungken man banta, bage nge usurna ka ia nutungken isi pusuhta man Tuhan?

I bas natsa sendah, sekalak diberu si ngenanami kiniseran ibas geluhna (ayat 2 ras 7). Janah kai si inanami Hana enda labo la iperdiateken perbulangenna saja lit denga akapna si kurang. Ku ja nge ingan si tepat guna nungtungken isi pusuhta e? Emaka ku Tuhan ngenca. Lawes me Hana ku Rumah Tuhan janahna ia ertoto. Ia terus ertoto man Tuhan subuk ia erlebuh man Tuhan bage pe ertoto i bas ukurna nari. Kai si itungtungken Hana i bas pertotonna man Tuhan? Eme segelah Tuhan mereken pupus. Janah la ia erngadi-ngadi ertoto guna si e. Emaka Hana megati kal ikataken *the most prayerfull mother* (bage min jadi bas Moria kerina).

Mbera-mbera ibas rusurna kita nuntungken isi pusuhta ku media sosial, kerina kita la lupa nandangi kai si ilakoken Hana. "Janah aku enggo ertoto nuntungken kerina kesusahenku man Tuhan" (ay.15). labo banci sidatken ketenengen, kedamen ras kemalemen ate adi terjeng nungtungken isi pusuhta ku media sosial. Ketenengen si tuhu-tuhu banci sidatken asum kita nuntungken isi pusuhta man Tuhan ngenca.